



Beograd, 29.11.2011. godine

**Govor ministra sigurnosti Bosne i Hercegovine Sadika Ahmetovića
“Prijenos najboljih praksi u borbi protiv org. kriminala na Zap. Balkanu”
Ministarska konferencija, Beograd-Sesija II-29.11.2011.godine**

Poštovane ekscelencije,
Kolege ministri,
Dame i gospodo,

Koristim ovu priliku da vam se zahvalim na pozivu za prisustvo ovoj konferenciji u ime Ministarstva sigurnosti Bosne i Hercegovine i u svoje ime. Također, izražavam svoje poštovanje i zahvalu organizatorima konferencije na izvrsno obavljenom poslu u odabiru gostiju, temi konferencije te samoj njenoj organizaciji.

Kada govorimo o “ Prijenosu najboljih praksi u borbi protiv organizovanog kriminala na Zapadnom Balkanu” smatram da je bitno istaći par jako značajnih činjenica:

Ideja jugoslovenskog jedinstva i saradnje utjelovljena u moto „bratstva i jedinstva“, ostala je da funkcioniše jedino na nivou rada organizovanih kriminalnih grupa. Rekao bih da ne postoji nijedna jednonacionalna organizovana kriminalna grupa, sve su multinacionalne sa svojim članovima ili vezama u svim zemljama regije.

Osnovni motiv njihovog rada je ilegalna dobit i skoro sve su većinom usmjerene uglavnom na trgovinu drogom, trgovinu ljudima, trgovinu oružjem, krijumčarenja ukradenim vozilima te visoko tarifnim robama.

Sa druge strane, prijenos dobre prakse je teorijski definisan kao proces identifikacije i učenje iz najbolje prakse, koja se primjenjuje na novo mjesto. Ključna činjenica u prijenosu najbolje prakse je da "primatelji najboljih praksi" razumiju potrebu za provedbu dobre prakse.

Dame i gospodo,

Smatram da smo mi odavno shvatili da organizovane kriminalne grupe negativno utječu na naš svakodnevni život, da opterećuju naše nacionalne ekonomije, potkopavajući našu sigurnost, te da slabe povjerenje naših građana prema našim političkim strukturama.

I kao rezultat toga, nastala je saglasnost o potrebi proširenja saradnje među svim zemljama regije u prevladavanju zajedničke opasnosti. Drugim riječima mi smo davno shvatili neophodnost u vezi sa uvođenjem najboljih instrumenata i praksi u borbi protiv organizovanog kriminala.

Ovom prilikom, ja se obraćam našim međunarodnim partnerima kao najčešćim posrednicima u prijenosu dobre prakse u zemlje regije, te ističem potrebu za što naglašenijim regionalnim pristupom u vezi s tim.

Naime, ukoliko imamo regionalni pristup u prijenosu dobrih praksi, jedan od rezultata će biti i homogenizirani i kompatibilni sistemi zemalja regije u borbi protiv organizovanog kriminala. Time će i naš odgovor organizovanim kriminalnim grupama biti jači i efikasniji.

Dosadašnja iskustva pokazuju kako regionalno povezivanje država osigurava najbolje mogućnosti ostvarivanje pojedinačnih ciljeva zemalja kao i regije u cijelini.

Potreba da se razvijaju međusobni odnosi kroz regionalnu saradnju dio su i opštih europskih procesa. To zapravo predstavlja praktično nastojanje da se zajednički odgovori na savremene izazove, što nijedna zemlja pojedinačno ne može uspijeti.

Toga smo svjesni i mi koji radimo u sektoru sigurnosti i zbog toga podržavamo i učestvujemo u svim regionalnim organizacijama, inicijativama, konferencijama i drugim aktivnostima koje doprinose stabilnosti i sigurnosti, ne samo Bosne i Hercegovine i regije, nego i Evropske unije u cijelini.

Ministarstvo sigurnosti Bosne i Hercegovine će i ubuduće u potpunosti podržavati sva nastojanja u ovom pogledu.

Na kraju, želim svima nama uspješan rad, uz uvjerenje da će ova konferencija biti značajan korak dalje, u jačanju saradnje zemalja regije u borbi protiv organizovanog kriminala.

Hvala.